



Broj: 01-26-1-022-7-II/12  
Sarajevo, 20.12.2012. godine

Na osnovu člana 25. stav (1) tačka e), člana 42. stav (1) tačka d), a u vezi s čl. 12., 14., 16., 17. i 18. Zakona o konkurenciji («Službeni glasnik BiH», br. 48/05, 76/07 i 80/09), rješavajući po Prijavi koncentracije privrednog subjekta NIS PETROL d.o.o. Banja Luka, Mladena Stojanovića 29, Banja Luka, podnesenu putem advokata Dine Duraković Morankić, Zmaja od Bosne 7, 71000 Sarajevo, Bosna i Hercegovina (na osnovu punomoći broj ND-P-146/12 izdate dana 28.11. 2012. godine u Banjoj Luci) zaprimljenoj pod brojem: 01-26-1-022-II/12 dana 04.12.2012. godine, Konkurencijsko vijeće je na 49. (četrdesetdevetoj) sjednici održanoj dana 20.12.2012. godine, donijelo

### **R J E Š E N J E**

1. Ocjenjuje se dopuštenom koncentracija koja će nastati na tržištu maloprodaje i veleprodaje naftnih derivata u Bosni i Hercegovini stjecanjem isključive kontrole privrednog subjekta NIS PETROL d.o.o. Banja Luka, Mladena Stojanovića 29, Banja Luka nad privrednom subjektom OMV BH d.o.o., Fra Anđela Zvizdovića 1, 71000 Sarajevo, Bosna i Hercegovina kupovinom 100% vlasničkog udjela.
2. Ovo Rješenje je konačno i upisuje se u registar koncentracija.
3. Ovo Rješenje bit će objavljeno u "Službenom glasniku BiH", službenim glasnicima entiteta i Brčko distrikta Bosne i Hercegovine.

### **O b r a z l o ž e n j e**

Konkurencijsko vijeće Bosne i Hercegovine (u daljem tekstu: Konkurencijsko vijeće) je dana 04.12. 2012. godine pod brojem: 01-26-1-022-II/12, zaprimilo Prijavu koncentracije (u daljem tekstu: Prijava) privrednog subjekta NIS PETROL d.o.o. Banja Luka, Mladena Stojanovića 29, Banja Luka (u daljem tekstu: NIS PETROL BiH ili Podnosilac prijave), podnesenu putem advokata Dine Duraković Morankić, Zmaja od Bosne 7, 71000 Sarajevo, Bosna i Hercegovina (na osnovu punomoći broj ND-P-146/12 izdate dana 28.11.2012. godine u Banjoj Luci) kojom privredni subjekat NIS PETROL BiH namjerava steći isključivu kontrolu nad privrednim subjektom OMV BH d.o.o., Fra Anđela Zvizdovića 1, 71000 Sarajevo, Bosna i Hercegovina (u daljem tekstu: OMV BH).

Podnosilac prijave je samoinicijativno Prijavu dopunio dana 13.12.2012 godine, aktom broj : 01-26-1-022-4-II/12, nakon čega je Konkurencijsko vijeće utvrdilo Prijavu kompletnom i u skladu sa članom 30. stav (3) Zakona o konkurenciji (u daljem tekstu: Zakon), dana 19.12.2012. godine pod brojem: 01-26-1-022-6-II/12 izdalo Potvrdu o prijemu kompletne i uredne Prijave.

Podnosilac prijave je u smislu člana 30. stav (2) Zakona naveo da namjerava podnijeti zahtjev za ocjenu koncentracije nadležnom tijelu za konkurenciju u Republici Srbiji.

Konkurencijsko vijeće je u skladu sa članom 16. stav (4) Zakona, dana 14.12.2012. godine objavilo Obavještenje o dostavljenoj Prijavi u dnevnoj štampi Bosne i Hercegovine (akt broj: 01-26-1-022-2-II/12 od dana 11.12.2012. godine), u kojoj su objavljeni podaci o namjeravanoj koncentraciji, te pozvalo sve zainteresovane strane na dostavljanje pisanih komentara u vezi provođenja iste. Na predmetnu Obavijest nisu dostavljeni komentari.

U postupku ocjene koncentracije, Konkurencijsko vijeće je utvrdilo slijedeće činjenice:

Prijava je podnesena u propisanom roku, u smislu člana 16. stav (1) Zakona.

## **1. Učesnici koncentracije**

Učesnici koncentracije su privredni subjekat NIS PETROL d.o.o. Banja Luka, Mladena Stojanovića 29, Banja Luka (uz saglasnost matične tvrtke privrednog subjekta Društvo za istraživanje, proizvodnju, preradu, distribuciju i promet nafte i naftnih derivata i proizvodnju prirodnog gasa "Naftna industrija Srbije" a.d. Narodnog Fronta 12, 21000 Novi Sad, Republika Srbija (u daljem tekstu:"NIS" a.d. Novi Sad), i privredni subjekat VIVA International Marketing und Handels Gmbh, Trabrennstrasse 6-8, 1020 Beč, Austrija.

### **1.1. Privredni subjekt NIS PETROL BiH**

Privredni subjekt NIS PETROL BiH, osnovan dana 13.09.2011. godine, je registrovan kod registra privrednih subjekata Okružnog privrednog suda u Banja Luci pod brojem (MBS): 57-01- 0235-11.

NIS PETROL BiH je u 100% vlasništvu Društva za istraživanje, proizvodnju, preradu, distribuciju i promet nafte i naftnih derivata i istraživanje i proizvodnju prirodnog gasa "Naftna industrija Srbije" a.d. Novi Sad, Narodnog fronta 12, Republika Srbija (u daljem tekstu: NIS a.d.).

Osnovna registrovana djelatnost privrednog subjekta NIS PETROL BiH je trgovina na veliko čvrstim, tečnim i gasovitim gorivima, mada isti još uvijek nije aktivan na tržištu Bosne i Hercegovine.

Privredni subjekt NIS PETROL BiH u vlasništvu ima 6 benzinskih pumpi u Republici Srpskoj i to u Bijeljini, Janji, Foči, Rogatici i dvije u Laktašima, kao i dvije benzinske pumpe u Bijeljini koje je uzeo u dugoročan zakup na period od 5 godina. Početak rada navedenih benzinskih pumpi očekuje se sredinom decembra 2012. godine

Privredni subjekat NIS PETROL BiH na relevantnom tržištu maloprodaje naftnih derivata ne posjeduje 10,0% ili više učešća u kapitalu u nekom privrednom subjektu niti 10,0% ili više prava glasa.

#### **1.1.1. Privredni subjekt NIS a.d.**

Privredni subjekt NIS a.d., osnovan dana 1.10.2005. godine, registrovan je kod Agencije za privredne registre Republike Srbije pod brojem 20084693.

Privredni subjekt NIS a.d. je jedna od najvećih vertikalno integrisanih naftnih kompanija u Jugoistočnoj Evropi. Bavi se istraživanjem, proizvodnjom i preradom nafte i prirodnog gasa kao i

prometom širokog asortimana naftnih derivata. Sjedište kompanije i njeni osnovni proizvodni kapaciteti se nalaze u Republici Srbiji.

Vlasnička struktura NIS-a na dan 31.12.2011. godine

Tabela 1.

<b>R.b.</b>	<b>Dioničari NIS-a</b>	<b>Udio dionica (%)</b>
1	Gasprom Neft – Ruska Federacija	56,15480
2	Republika Srbija	29,87413
3	Ostali akcionari	13,96821

Izvor: Podaci iz Prijave

Poslovne aktivnosti privrednog subjekta NIS a.d. u 2011. godini su bile organizovane u okviru pet blokova: istraživanje i proizvodnja, servisi, prerada, promet i energetika. U rafinerijama se proizvodi široki spektar derivata nafte i derivata prirodnog gasa koji odgovaraju međunarodnim standardima kvaliteta i proizvođačkim specifikacijama rafinerija. Privredni subjekt NIS a.d. također proizvodi vodu za piće pod nazivom "Jazak".

Pored navedenog, privredni subjekt NIS a.d. nudi svojim klijentima usluge prerade nafte, transport i skladištenje naftnih derivata, usluge akreditovanih laboratorija za ispitivanje i etaloniranje, usluge naftnih servisa (bušenje, opremanje i remont naftnih, gasnih i geotermalnih bušotina, geofizička ispitivanja i mjerenja, održavanje i izgradnja sistema za proizvodnju nafte i gasa, odražavanje i remont opreme, izgradnja i održavanje transportnih cjevovoda, bušenje, opremanje i remont bunara za vodu za piće, transport materijala i opreme) i usluge naučno-tehničkog centra (projektovanje istražnih geoloških radova, geofizičkih radova i razrade ležišta, projektovanja i druge inženjering usluge).

Tokom 2011. godine započeo je projekat modernizacije maloprodajne mreže kojom obnavlja koncepciju benzinskih stanica pod brendom NIS Petrol.

### **1.1.2. Ostala povezana društva privrednog subjekta NIS a.d. na tržištu Bosne i Hercegovine**

Privredni subjekt NIS a.d. na tržištu Bosne i Hercegovine je većinski vlasnik privrednog subjekta Jadran-Naftagas d.o.o. Banja Luka, Ivana Franje Jukića 7, Banja Luka (u daljem tekstu: Jadran-Naftagas), koji je registrovan u registru privrednih subjekata Okružnog privrednog suda u Banja Luci, pod brojem (MBS): 57-01-0312-10 sa vlasničkim udjelom od 66%. Preostalih 34% vlasničkog udjela posjeduje privredni subjekt "Naftegazovaja Innovacionnaja Korporacija" a.d. Moskva, Ruska Federacija.

Privredni subjekt Jadran Naftagas je osnovan 14.12.2010. godine (Rješenje Konkurencijskog vijeća br. 02-26-1-031-19- 11/10 od 26.05.2011. godine).

Pretežna registrovana djelatnost privrednog subjekta Jadran Naftagas je istraživanje i proizvodnja nafte i gasa, te srodne djelatnosti koje se odnose na vađenje sirove nafte, vađenje prirodnog gasa,

uslužne djelatnosti u vađenju nafte i gasa (osim istraživačkih radova), te ispitivanje terena bušenjem i sondiranjem.

Analizom relevantnih podataka iz arhiva Konkurencijskog vijeća, te javno dostupnih podataka, utvrđeno je da je Ruska Federacija na posredan način vlasnik i privrednog subjekta NESTRO Petrol a.d. Banja Luka koji je prisutan na relevantnom tržištu i NIS PETROL BiH.

Naime, privredni subjekat NESTRO PETROL je u 80,0000031% vlasništvu privrednog subjekta NeftegazInko koji je u većinskom vlasništvu državnog preduzeća Ruske spoljnotrgovinske asocijacije Zarubrežnjeft iz Moskve dok je NIS PETROL BiH preko NIS a.d. u većinskom vlasništvu od 56,1548% , privrednog subjekta Gasprom ( Tabela 1) čiji je većinski vlasnik u iznosu od 50.002% Ruska Federacija.

## **1.2. Privredni subjekt VIVA International Marketing und Handels GmbH,**

Privredni subjekt VIVA International Marketing und Handels GMBH, Trabrennstrasse 6-8, 1020 Beč, Austrija (u daljem tekstu: VIVA) je registrovan i upisan u registar kod privrednog suda u Beču pod brojem (FN): 242445 m i povezani je privredni subjekt privrednog subjekta OMV AG, matičnog društva tzv. OMV grupacije i isključivi je vlasnik OMV BH.

Privredni subjekt VIVA International Marketing nema drugih povezanih društava na teritoriji Bosne i Hercegovine.

### **1.2.1. Privredni subjekt OMV BH - predmet koncentracije**

Privredni subjekt OMV BH je registrovan kod registra poslovnih subjekata Općinskog suda u Sarajevu pod brojem (MBS): 65-01-0638-11 i u 100% je vlasništvu privrednog subjekta VIVA. Privredni subjekt OMV BH obavlja djelatnosti trgovine različitim vrstama goriva, ulja i maziva klijentima u BiH i to u oblasti maloprodaje i veleprodaje. Maloprodajna mreža privrednog subjekta OMV BH primarno podrazumijeva ponudu dizel i benzin palete proizvoda sa posebnim naglaskom na premium proizvode.

Osnovnu imovinu privrednog subjekta OMV BH čini 27 vlastitih benzinskih pumpi kao i jedna benzinska pumpa koju OMV BH koristi na osnovu zakupa. U sklopu benzinskih pumpi nalaze se i nespecijalizovane prodavnice na malo kao i restorani/prodavnice hrane i autopraonice pod brendom VIVA, kao sporedne uslužne djelatnosti koje privredni subjekt OMV BH pruža svojim kupcima u okviru maloprodajne mreže.

Privredni subjekt OMV BH posjeduje naftni terminal u Srebreniku (ukupni skladišni kapacitet je oko 750.000 m<sup>3</sup>), te zakupljuje skladišne kapacitete na nekoliko drugih lokacija.

## **2. Obaveza prijave koncentracije**

Obaveza prijave koncentracije nastaje, u smislu odredbe člana 14. stav (1) Zakona, kada učesnici koncentracije prodajom roba i/ili usluga ostvare na svjetskom tržištu 100 miliona KM po završnom

računu u godini koja je prethodila koncentraciji, i kada ukupni godišnji prihodi svakog od najmanje dva privredna subjekta učesnika koncentracije ostvareni prodajom roba i/ili usluga na tržištu Bosne i Hercegovine iznose najmanje 8 miliona KM po završnom računu u godini koja je prethodila koncentraciji, ili ako je njihovo zajedničko učešće na relevantnom tržištu veće od 40%.

Ukupni godišnji prihodi privrednih subjekata učesnika koncentracije (i njihovih povezanih privrednih subjekata), na dan 31.12.2011. godine:

Tabela 2.

	NIS a.d		NIS PETROL	VIVA		OMV BH
	RSD	KM	KM	EUR	KM	KM
Svijet	<sup>1</sup> (..)**	(..)**	(..)**	(..)**	(..)**	(..)**
BiH	(..)**	(..)**	(..)**	(..)**	(..)**	(..)**

Izvor: podaci iz Prijave

Konkurencijsko vijeće je utvrdilo (Tabela 2.) da su učesnici koncentracije ispunili uslove ostvarenog ukupnog prihoda (na svjetskom tržištu i tržištu Bosne i Hercegovine) iz člana 14. stav (1) Zakona, te su obavezni podnijeti Prijavu.

Godišnji prihodi učesnika koncentracije predstavljaju ukupne prihode (bez poreza na dodatnu vrijednost i drugih poreza), u smislu člana 9. tačka h) Odluke o načinu podnošenja prijave i kriterijumima za ocjenu koncentracija privrednih subjekata.

### 3. Pravni okvir ocjene koncentracije

Konkurencijsko vijeće je u provođenju postupka ocjene predmetne koncentracije primijenio odredbe Zakona, Odluke o načinu podnošenja prijave i kriterijumima za ocjenu koncentracija privrednih subjekata i Odluke o utvrđivanju relevantnog tržišta ("Službeni glasnik BiH", br. 18/06 i 34/10).

Konkurencijsko vijeće, u skladu sa članom 43. stav (7) Zakona, pri izračunavanju ukupnih godišnjih prihoda učesnika koncentracije je koristilo kriterijume i standarde Obavijesti Evropske komisije o izračunu ukupnog prihoda u skladu sa Uredbom Vijeća (EEZ) broj: 4064/89 o kontroli koncentracije privrednih subjekata.

### 4. Pravni osnov i oblik koncentracije

Pravni osnov predmetne koncentracije predstavlja Ugovor o kupoprodaji, zaključen dana 30. novembra 2012. godine između privrednog subjekta VIVA sa jedne strane i NIS a.d. i NIS BiH sa druge strane.

Naime, privredni subjekti NIS PETROL i NIS a.d. kao kupci i privredni subjekt VIVA, kao prodavac zaključili su dana 30.11.2012. godine Ugovor o kupoprodaji kojim privredni subjekt NIS a.d., putem svog povezanog privrednog subjekta NIS PETROL, kupovinom 100% vlasničkog udjela namjerava steći isključivu kontrolu nad privrednim subjektom OMV BH.

<sup>1</sup>(..)\*\* podaci predstavljaju poslovnu tajnu

U skladu sa naprijed navedenim, pravni oblik predmetne koncentracije je stjecanje kontrole ili dominantnog utjecaja jednog privrednog subjekta nad drugim kupovinom većine dionica ili učešća osnovnog kapitala u skladu sa članom 12. stav (1) tačka b) Zakona.

## 5. Relevantno tržište

Relevantno tržište, u smislu člana 3. Zakona, te članova 4. i 5. Odluke o utvrđivanju relevantnog tržišta, čini tržište određenih proizvoda i/ili usluga koji su predmet obavljanja djelatnosti na određenom geografskom području.

Prema odredbi člana 4. Odluke o utvrđivanju relevantnog tržišta, relevantno tržište proizvoda obuhvata sve proizvode i/ili usluge koje potrošači smatraju međusobno zamjenjivim s obzirom na njihove bitne karakteristike, kvalitet, namjenu, cijenu ili način upotrebe.

Prema članu 5. Odluke o utvrđivanju relevantnog tržišta, relevantno tržište u geografskom smislu obuhvata cijelu ili dio teritorije Bosne i Hercegovine, na kojoj su tržišni konkurenti aktivni u prodaji i/ili kupovini relevantnog proizvoda pod jednakim ili dovoljno ujednačenim uslovima koji to tržište bitno razlikuju od uslova tržišne konkurencije na susjednim geografskim tržištima.

Imajući u vidu da se OMV BH nad kojim se stječe kontrola bavi maloprodajom i veleprodajom različitih vrsta goriva, ulja i maziva na teritoriji BiH, relevantnim tržištem proizvoda u predmetnoj koncentraciji smatra se tržište maloprodaje i veleprodaje naftnih derivata.

Budući da je OMV BH poslovno aktivno na cijeloj teritoriji BiH, relevantnim geografskim tržištem u predmetnoj koncentraciji smatrat će se teritorija Bosne i Hercegovine.

Na osnovu navedenog, kao relevantno tržište proizvoda smatra se tržište maloprodaje i veleprodaje naftnih derivata, dok je za relevantno tržište u geografskom smislu određena teritorija Bosne i Hercegovine.

## 6. Analiza relevantnog tržišta

Tržište maloprodaje naftnih derivata u BiH je veoma fragmentirano, sa velikim brojem benzinskih pumpi u vlasništvu malih operatera za koje se procjenjuje da drže oko 75% od ukupnog broja maloprodajnih objekata.

Tržišni udio NIS PETROL BiH na relevantnom tržištu maloprodaje naftnih derivata u Bosni i Hercegovini u 2011. godini (prema broju benzinskih pumpi) je oko 0,2% dok je tržišni udio OMV BH oko 2,5 %.

Tržišni udjeli glavnih konkurenata po broju benzinskih pumpi na relevantnom tržištu za 2011. godinu su sljedeći:

Tabela 3.

R. b.	Privredni subjekt	Broj benzinskih pumpi	Tržišni udio (%)
1.	NESTRO Banja Luka	98	8,8
2.	MOL	65	5,8
3.	INA	45	4,0
4.	Petrol d.d.	37	3,3
5.	Krajinapetrol Banja Luka	15	1,3
6.	EKO	3	0,3
7.	<b>OMV BiH</b>	<b>28</b>	<b>2,5</b>

<b>8</b>	<b>NIS PETROL</b>	<b>2*</b>	<b>0,2</b>
9.	Ostali	829	74,0
10	<b>Ukupno (7+8)</b>	<b>30*</b>	<b>2,7</b>
11.	Ukupno	1120	100,00

Izvor: podaci iz izvještaja Wood Mackenzie – Downstream Oil Service – Europe March 2012 Bosnia and Herzegovina i interni podaci učesnika koncentracije

\*privredni subjekt NIS PETROL je tek u 2012 godini stekao kontrolu nad dodatnih 6 benzinskih pumpi (4 kupoprodajom i 2 putem zakupa). Niti jedna od osam benzinskih pumpi koje kontroliše NIS PETROL nije počela sa radom.

Obzirom da NIS PETROL BiH još uvijek nije aktivan na tržištu BiH, ukoliko se procjena tržišta maloprodaje naftnih derivata vrši na osnovu broja benzinskih pumpi na relevantnom geografskom tržištu, očekuje se da će nakon provođenja namjeravane koncentracije, NIS PETROL BiH imati udio od oko 3,2% od ukupnog broju benzinskih pumpi (8 benzinskih pumpi koje su trenutno pod kontrolom NIS PETROL BiH plus 28 benzinskih pumpi pod kontrolom OMV BH).

Tržišni udjeli glavnih konkurenata po količini realizovane maloprodaje naftnih derivata u 2011. godini su sljedeći:

Tabela 4.

<b>R.b.</b>	<b>Privredni subjekt</b>	<b>Tržišni udio (%)</b>
1.	INA	4,7
2.	MOL	6,3
3.	NESTRO	8,5
4.	<b>OMV BH</b>	<b>7,5</b>
5.	PETROL d.d.	6,0
6.	Ostali	67,0
7.	Ukupno	100

Izvor: podaci iz izvještaja Wood Mackenzie – Downstream Oil Service – Europe March 2012 Bosnia and Herzegovina i interni podaci učesnika koncentracije

Obzirom da NIS Petrol još uvijek nije aktivan na relevantnom geografskom tržištu, može se očekivati da će nakon namjeravane koncentracije, tržišni udio NIS PETROL BiH na tržištu maloprodaje naftnih derivata iznositi oko 7,5% odnosno biti jednak udjelu OMV BH na relevantnom tržištu.

Na relevantnom tržištu veleprodaje naftnih derivata NIS PETROL BiH i NIS a.d. nisu bili aktivni u toku 2011. godine dok je procjena da je udio OMV BH u 2011 godini bio manji od 1%.

Nakon provođenja predmetne koncentracije može se očekivati da će tržišni udio društva NIS PETROL BiH na tržištu veleprodaje naftnih derivata iznositi manje od 1% što odgovara udjelu OMV BH na ovom tržištu budući da NIS PETROL i NIS a.d. na istom nisu bili aktivni.

Imajući u vidu navedeno pod tačkom 1.1.3, Konkurencijsko vijeće je analiziralo i tržišne udjele učesnika koncentracije i privrednog subjekta NESTRO te zaključilo da predmetnom koncentracijom neće doći do značajnog uvećanja zajedničkih tržišnih udjela ( Tabela 4. i Tabela 5.)

## **8. Ocjena predmetne koncentracije**

Konkurencijsko vijeće je analizom relevantnih podataka, u smislu člana 17. Zakona, ocijenilo da provođenjem namjeravane koncentracije neće doći do narušavanja tržišne konkurencije, odnosno stvaranja ili jačanja dominantne pozicije učesnika koncentracije.

Naime, NIS Petrol BiH (odnosno matična tvrtka "NIS" a.d. Novi Sad) prije provođenja predmetne koncentracije je imao osam benzinske stanice (koje još nisu poslovno aktivne) na relevantnom tržištu maloprodaje naftnih derivata Bosne i Hercegovine, te sa 28 novih benzinskih stanica koje su predmet ove koncentracije, te njegovo tržišno učešće neće biti značajno povećano ako se u obzir uzme ukupan broj od 1120 bezninskih pumpi na relevantnom geografskom tržištu.

Također, Konkurencijsko vijeće je uzelo u obzir da Podnosilac prijave ovom koncentracijom ima namjeru povećati svoju maloprodajnu mrežu u Bosni i Hercegovini, odnosno dodatnim ulaganjem modernizovati kupljene objekte i opremu s ciljem uvođenja inovacija, povećati kvalitet proizvoda/usluga te proširiti asortiman proizvoda/usluga za krajnje potrošače.

Imajući u vidu navedeno, Konkurencijsko vijeće je u smislu člana 18. stav (2) tačka a) Zakona donijelo odluku kao u dispozitivu ovog Rješenja.

## **9. Administrativna taksa**

Podnosilac prijave, u skladu s članom 2. tarifni broj 107. stav (1) tačka d) pod 1) Odluke o administrativnim taksama u vezi sa procesnim radnjama pred Konkurencijskim vijećem („Službeni glasnik BiH“, br. 30/06 i 18/11), dužan je platiti administrativnu taksu na ovo Rješenje u iznosu od 2.500,00 KM, u korist Budžeta institucija Bosne i Hercegovine.

## **10. Pouka o pravnom lijeku**

Protiv ovog Rješenja nije dozvoljena žalba.

Nezadovoljna stranka može pokrenuti upravni spor pred Sudom Bosne i Hercegovine u roku od 30 dana od dana prijema ovoga Rješenja, odnosno od dana njegovog objavljivanja.

**Predsjednik  
Gordana Živković**